

Saxulutywa !—Ngamatye Omsebenzi !!

(Yimbongikazi Nontsizi Mgqwetto.)

Bona ke ! Namhlanje ndifan' ugondile
Mfondini wakowetu nantso intlekele
Balwa ngomsebenzi, sisate manga
Nawe ke namhlanje ngaw' yeka
[amawonga.]

Nezidenge e Africa mazitete !—
E Dekapolis izidenge zateta
E Jeriko zakangela nemfama
Mazibone namhla nezetu imfama.

Nenkokeli mazivuke e Afrika
Zingapili ngamatambo naludaka
Zenze isikalo apa zikumbule
Lenzala ye Afrika ite rerelele.

Makowetu ! Ibahlungu lenyaniso
Namhlanje yesimini zalo mbuso
Waduda unetemba lesi Bhalo
Wati lahlani eyenu imibhalo.

Nandzo—izigebenga ! Nango—nama—
[sela]

Ndakuvumbulula mna ndonosela
Naxulutywa ngamatye ngabapambukeli
Abadla e Jordani bengaliweli.

Inyaniso masipatwe ngenaninye
Inyaniso kungaviwa bantu banye
Nantso ke ! Inyaniso yesi Bhalo
Napantsi ke, kweyetu imibhalo.

Inkokeli mazilale ngemihlana
Ziyeke lento yokube ziqatisa
Kuliwa ngomsebenzi akungazintonga
Ipi ? Ke eyenu ? Ngawuxele ke ntanga

Nabiza ! Imali isinga nesinga
Yenzeni ke namhla ? Ngaw' xele ke
[ntanga]

Sacikoza nje sada saqitisa
Yalala—ingqondo yokuzipilisa.

U Yehova Esimema ngako konke
U Yehova Esibiza ngama Conke
Ukutsho ke nditi kule yomsebenzi
Sakude—Sifunde ! Udatwe nge Lizwi
Camagu !

Balwa ngomsebenzi, akungazintonga
Namhla nje ke nawe ngaw' yeka
[mawonga]

Anikoyikina ? Ukuzak' ityala
Nayeka Izizwe sambete izandla ?
Umanyano nje kupela lungamandla
Kuba lulo lodwa olunokusondla
Zonk' intshaba zakoyiswa ngenxa yalo
Nentsika ze Zulu zakwapulwa ngalo.

Kunini kodwa sigqora okuteta
E Dekapolis nezidenge zateta
E Jeriko zakangela nemfama
Mazibone ! Namhla nezetu imfama
Camaguni ! Mazulu !